



諭祭文

皇帝諭祭刑部尙書加一級謚端恪姚文然之靈曰朕惟股肱之臣服勤王事其生也優爵祿以崇獎之其歿也錫寵章以追卹之蓋旌賢報勞國典攸重所以風有位也爾姚文然學有本源才堪肆應端方砥行恪謹持躬久歷垣省擢貳臺憲分掌邦禁旋佐司戎惟奉職之無愆屢遷除于不次迄乎總持風紀晉長秋官爾益諳習朝章精求律例方冀明刑弼教助理化成乃寢疾經旬遽聞淹逝朕追思勞績軫悼有加咨命易名葬祭如禮於戲良彥云徂班行永謝臣能盡瘁國

虛直軒文集

廣仁堂

貳百貳拾玖

歆承

康熙十七年

月

日

國朝

刑部

諭祭文

姚文然

諭葬碑文

朕惟古之良臣祇服厥官生有宣力之勤歿有易名之典用  
昭懿德式勸將來爾姚文然學本家修行惟實踐自居省闈  
屢奏封章論事務期精詳宅心本於忠篤由茲拔擢洊陟卿  
班履重任而彌處以小心持大體而不遺於細務蓋其生平  
厥歷多在法司謹守紀綱而僚屬胥勸斟酌律例則聽斷稱  
平方嘉乃勞忽殞厥命宜崇褒卹以示榮哀爰頒祭葬之儀  
錫以端恪之謚嗚呼夙夜匪懈既克効於當官恩禮有加俾  
永傳於後世勒之金石服我寵休

康熙 年 月 日

盧直軒文集

二

廣仁堂  
壹百玖拾叁

敕建本邑賢良專祠諭祭文

翊熙朝之泰運端重良臣稽冊府之鴻猷宜崇元祀益成勞  
懋著生平之風概如存斯盛烈照垂奕世之寵褒益篤載申  
綸綍式薦牲醪爾姚文然品行端方學術淵邃省垣獻納審  
諤本於肫誠卿列踐登敬慎勵其精白暨總持平風紀益殫  
完人樹範巖廊允矣千秋之茂典列豆籩於祠宇渥澤攸隆  
布筵几於里閭湛恩疊沛靈其不昧尙克歆承

雍正八年 月 日

虛直軒文集

三

廣仁堂  
壹百捌拾叁

光祿大夫刑部尙書加一級諡端恪姚公神道碑銘

皇清康熙戊午季夏刑部尙書姚公諱文然字若侯別號龍懷年五十有九卒于京邸方疾革

上遣侍讀學士張公英詣榻前視病垂問深至次日口授遺表謝

恩卽逝復奉

溫綸軫念甚切

予諡端恪

賜祭葬一時滿漢大臣以及僚屬嫻友罔不傷悼泣下爲朝廷惜此人也余交先生三十年同受

虛直軒文集

四

廣仁堂  
卷百陸拾玖

兩朝知遇竊見先生前有直言敢諫之風後有明刑弼教之義入則孝友忠厚世其家出則睦嫻任卹行其志先生一身生天地閒如太和元氣流行充滿而無乎不至一旦老成云亡甯獨生死知交徬徨而涕泗也哉恭憶順治八年

世祖章皇帝親攬萬幾掃除一切貪殘惰慢黨讐詆訐之習廣求直言問民疾苦當是時御史臺無憲綱使者冠蓋相望吏不戢而民生日蹙先生官給事中首建察吏安民一疏請以法度裁制憲臣俾賢者有以自立而不肖無以自容願

賜召對面議異同疏入憲臣及御史甄別各有差臺班爲之一清先生澄清天下之志概見于斯矣又以一身激發直臣

之氣前後在諫垣十餘年凡有關於國計民生者疏凡數十  
上罔所忌諱如請改江浙漕糧拯災黎也請免大臣鎖禁崇  
國體也請嚴撫臣私委安地方也請選清書言官廣言路也  
請

賜御筆勾除重人命也請禁採木詐害恤困苦也請立流抵  
由單防侵冒也請停本色駁減杜私派也請裁蘆差宥官罷  
騷擾也請徵皮張折色除賠累也諸疏悉荷

俞旨海內稱便康熙九年庚戌陞四品京堂仍留管戶科給  
事中事辛亥五月

特擢都察院左副都御史日理法司大案見盜案之因諱而

虛直軒文集

五

廣仁堂  
肆百零肆

日熾也請復半獲開俸之舊例以拔諱盜之根又見永戍之  
因併贓坐罪也請議入己之贓方坐以昭立法之平俱著爲  
例是年陞刑部右侍郎壬子轉左侍郎癸丑以兵部督捕左  
侍郎管右侍郎事奉

命往讞江南違禁出洋及都統互訐三案其沙洲之案曹永  
貞周魁坐誣虞仲魁等皆釋瀏河之案程開之坐法周明宇  
張思溪皆釋京口之案將軍與副都統總兵兩棄而皆釋先  
生出洋入港往復洪濤烈日中親驗所獲船無出洋篷桅新  
舊梅花椿皆未動眾心折服情律允協後

命悉如所議十二月陞都察院左都御史任愈大而責愈重

謨猷入

告動關機要如請蚤建

皇儲以隆國本寬蜀中丈量之期以省勞費又以

展祭

山陵

鑾輿遠出請嚴城池詐冒之防恤旗衛驛地之苦又以淮揚大饑米價騰湧請動官帑于山東產米地方採買自膠州諸處海運達于淮安之廟灣以備賑濟又以

仁孝皇后梓宮奉安鞏華城天方盛暑

車駕屢幸請節勞節哀頤養

虛直軒文集

六

廣仁堂  
卷百肆拾壹

聖躬先生忠君愛國之忱未嘗一刻去諸懷也乙卯

覃恩授光祿大夫加一級丙辰七月陞刑部尚書受事卽清滯囚理冤獄更定條例瞿瞿憂思嘗曰刃殺人于一時有限例殺人于萬世無窮與同事諸公虛心參酌去其甚者皆漸劑寬平每入署必攜招冊盈尺以歸秉燭夜分細加檢閱有疑卽手書節略務期肺石無冤以副

天子好生至意全活一人則喜形于色否則蹙然不樂者竟日先生忠厚之性過人遠矣先是

本朝初年先生應召起贈大夫純甫公趣行曰吾姚桐城舊家也門祚近稍薄汝前爲庶常三月亂亂中黨議且及我廢

輿命也汝出則我處不然八兄弟離矣先生復補庶常歷今  
官中丁母倪太夫人憂致哀致敬一準於禮以純甫公春秋  
高請假左右膝下十年兒孫導輿爲娛樂伯仲覲侯集侯頴  
頴號三姚母卒趣翼侯力學登進士課諸弟迄有成立妹阿  
方蚤寡爲教其子晉祐又貸六百元代輸其先人之逋于官  
者曰吾體太夫人志也迨翼侯卒先生悲痛不自勝傷其作  
吏備艱苦宦橐蕭然且乏嗣手足之不幸也遂不起其孝友  
蓋如此每歲計祿入所餘分爲恆敦時慈四目以媵姻親師  
友孤嫠之家及婚嫁卒葬之不時並族黨僕從之無告者歲  
約數百金以爲常京師城內外多棄嬰兒先生同益都相國  
虛直軒文集

七

廣仁堂  
肆百宋路

捐資置車收載兼營乳哺建堂曰育嬰委曲區畫存活甚多  
至于完娶人妻孥代償人逋負或爲地方陳疾苦計利害眞  
心古道周于朋儕鄉里閒了無德色其在桐邑錢糧立官收  
官解之法田地定三等九則之均友人子韓君高君陳君及  
溧陽公子輩受其賜頗厚此類指不勝屈云先生歷官久戊  
子主山左鄉試癸丑復主會試衡文一以典雅正大爲宗遜  
眞才絕請謁兩榜得人稱盛遇歲時令節屬員故吏有所遺  
弗受江甯公幹畢地方大僚惟贈古書數卷而已先生自奉  
甚儉不與人宴會日食饘粥泊如也余才不逮先生素以大  
業相砥礪先生中懷坦白居然古大臣且仁人也若敬獄長

王國庶幾刑措不用余將勉持綱紀從先生後其視太平之盛今已矣卽欲於

延臣集議時一聞先生侃侃正論開人不敢開之口者不可得又安得不爲

朝廷惜此人耶昔女齊死叔向哭而撫其子曰自此其先人之亡吾蔑與比而事君矣先生輻車登舟之先令嗣長士暨仲士堂持狀泣以碑銘請余不文不獲辭輒撫而許之亦猶叔向之意乎嗚呼先生生而天下樂死而天下思乃自言曰憂人之憂樂我之樂萬物一體襟懷殆始終焉與范文正先憂後樂千古一轍後之人經其地撫其碑必有感而興起者

虛直軒文集

八

廣仁堂  
碑百柒拾肆

矣先生遭逢

盛世德業彰聞勒在墓表誌銘者甚悉生卒年月婚配子女茲不再述所著虛直軒文集詩集自雲語錄山中日記刪輯朱子語類次第行于世

銘曰天福社稷良弼挺生物我同體廉靜寡營口不談學事則躬行忠言讜論一心之誠明罰敕法天下之平養國元氣貽親令名子孫百世豐碑永貞俯皖水而仰龍山尙書之聲賜同進士出身通奉大夫都察院左都御史前戶部左侍郎加一級充武

殿試讀卷官右侍郎侍

經筵大理寺卿順天府府尹都察院左僉都御史內陞以正  
四品頂帶食俸仍留管貴州道監察御史事貴州道監察御  
史巡視北城癸丑文會試監試壬子武鄉試監試吏科都給  
事中刑科左工科右刑科給事中己丑會試同考內翰林國  
史院庶吉士眷年弟雲中魏象樞頓首拜撰

虛直軒文集

九

廣仁堂  
壹百壹拾玖



序

孔子曰有德者必有言德者其內也言者其外也心之精微人不能知而施之於言惟影響傳世行遠爲聳聽觀感之具何哉誠之形也誠積於中雖其喞喞然不能出諸其口而人莫不喻而况乎其辭足以達之哉稽之於書咎繇之謨略而雅周公之誥煩而悉惟所趨之不同而要其質誠無僞之心流於文墨之間以此獲乎上而孚於有眾則一而已實之不足而託乎辭以爲工是所謂徒有枝葉者也故古之君子雅不居作者之名而其言俱可爲經後世萬無有幾之者古者德與言爲一途而卒乃歧而二之也吾師姚端恪公自入仕

虛直軒文集

韓序

十

廣仁堂  
肆百零肆

任言責後爲上卿所歷皆法官於

國家利害吏治得失民生休戚知無不言言無不當尤矜恤民命惟恐一物之不得其所纖毫出入之疑必折而歸之於中其大者具諸章疏而餘亦往往散見於他藁公既歿而其子士璽等哀爲一集以行世而屬序于裝褙伏讀而歎曰有以夫公之言不徒以言而已也公仁以宅心敬以守己念既出而受若職豈可怠若事其致主澤民之志斯須不忘所建白皆天下大計而尤推本於

一人故倦倦以調護

聖躬節愼起居爲言時茲獲侍

講幄見公叩首

丹陛言發涕零言人所不敢言而

上受之不拂也勿欺而犯公何愧哉在刑部推廣

上恩所全活甚眾先是公爲科臣已屢上慎刑之疏至是益自發舒不蔽法不市恩一酌乎人心之安而猶恐失之嘗刺一人于法有不應而爭之不得公退而炷香長跪自責久之其刻已恕物類此今讀公諸疏固可以想見而白雲語錄參酌諸例鉅細畢貫法律家可長據而守也公嘗自書坐隅曰常覺胸中生意滿須知世上苦人多又曰憂人之憂樂我之樂又曰口口說誠事事求誠誠則中和百病不生又曰病之虛直軒文集

韓序

十一

廣仁堂  
參百米拾

起因不誠起種種纏繞狐疑嗚呼公之精神具此矣其爲有德者之言以是夫故公之文如食之有菽粟久之有味如藥之有參苓餌之有補豈欲以文辭自豪而豪於辭者莫得而窺其涯際也公暇時爲歌詩甚富蘊藉醕厚有古風平居一言一語皆可書垂帶亦其生意之充滿者然也誠也茲竊舉此以序公庶幾其足蔽乎嗚呼學者由是集而得其門焉其亦求誠之方也與

康熙乙丑秋七月門人韓莢謹序

康熙十七年六月先師端恪公薨於京師閱五年嗣君注若輩會梓其文集若干卷梓成俾秉義序之嗟乎秉義何能序先師文集哉獨是先師之惠澤在人閒言行在國史而忠愛之隱愷摯之情在茲集秉義辱先師知遇幸得託如侯芭之於子雲其敢以不文辭哉竊惟大易曰言有物物者立言之本也故毘陵亦云視其中必有一段不可磨滅之處斯其文爲必傳之文後世家挾丹鉛人矜著作諦視其中靡然無有則雖極瑯章繪句取青煒白之能事究於文奚當乎先師不欲以文自見者也感

虛直軒文集

徐序

十二

廣仁堂  
肆百壹拾叁

先帝與

皇上特達之知每事必竭其智慮三厯省垣剖誠露膽知無不言以至入臺端而統憲聽棘木而祥刑惟孜孜爲

朝廷肅綱紀之權洽好生之德於家庭則承歡色笑五十而孺慕依然於朋友則相長相規久要而臭蘭無閒蓋至性所注充滿於倫物溢而爲文故讀前後奏疏及白雲語錄而見蹇蹇盡瘁之忠悃焉讀所與當事諸書而見利弊詳明之善道焉讀途中憶友諸什而見屋梁落月朏懇於師友之交情讀記序諸體而見原本經史與夫通達古今之學術以至長篇短牘隨所摭寫莫不有固結不可解之性情寓於其中故

雖安瀾平野亦見突兀崢嶸魚龍變化以其文爲有物之文  
其斯爲文之至乎先師於書無所不讀而尤邃於易故集中  
於詮易特詳論語云五十學易可無大過止期無過不期功  
也先師兢兢於了凡功過格奉行無間然第借以報親恩達  
惻隱而其生平得力究以內訟自反爲主故虛直軒所記於  
夢中嘗講三自反章非與世之硃墨毫釐者比也又江浙日  
記旅店中靜坐重負頓釋宿病霍然此又何異梁溪之旅店  
桃花乎茲集出必有讀而自得先師者知不以鄙言爲阿所  
好也

康熙癸亥六月旣望門下士崑山徐秉義謹書

虛直軒文集

徐序

十三

廣仁堂  
貳百壹拾柒

大司寇姚端恪公既薨之明年其令子士璽輩相與收拾遺文惟恐失墜又明年擔擔類次鏤版以傳以予忝公茂蔭之戚又辱公詩文之知屬爲之序予讀之作而歎曰古稱太上立德其次立功若公者其德足以表人倫其功足以翊

國祚豈屑屑與珣章續句之徒鬪工拙于文字閒哉然其學殖之所醞釀才識之所剴割往往于文字見之千載而下低徊愴慕求公之所以立德與功者而不可得猶可誦其詩讀其書而想見其爲人也則茲集之傳安可少哉以予觀公古文辭如序記書啓諸作皆卓然成一家之言而其最大者莫虛直軒文集

潘序

十四

廣仁堂  
肆百貳拾

如歷官諸奏疏及白雲語錄蓋公正色立

朝數十年一以忠

君愛國爲心于政府大議法司大獄與夫

國體之得失民生之利病靡不早作夜思期于存大體而葆元氣所敷陳條對皆切實詳明務中肯綮如岐嶠之治病深診其癥結所在有是病卽有是方卽有是應方之藥又卽有是防藥已病之方不以風聞塞白不以訐擊沽名其語錄平反冤抑劑以寬平受代者至相與傳寫誦習奉爲玉律金科亦可以見其一斑矣公少卽工詩予猶及見其諸生時唱和之什大都沉浸醲郁調高而響亮可以叶宮商被筦絃請假

而後築竹里別業以娛嚴親益搏心肆力于詩歌所著擬古詩如干首直軼三唐而上嘗曰古詩溫柔敦厚其質也至其神氣生動思婦羈人之情狀千年而下如見其形如聞其聲或密而疎似直而曲建安則子建庶幾近之唐惟李青蓮得其一二而已吁公之論詩若此豈復有餘子在其目中哉公與同里樞部馬正誼先生皆覃思腐毫力障詞瀾而平生口不言詩其全集皆歿後始出人間視今之自命詩人者何如也或謂公奏議可匹陸忠宣詩歌可匹杜少陵然忠宣起家進士詩寥寥無聞少陵賦記表狀諸體亦少杰作鮮有能兼之者兼之者其惟唐之樂天退之宋之永叔子瞻足以匹公

虛直軒文集

潘序

十五

廣仁堂  
肆百陸拾柒

乎樂天指陳時政忠言讜議奚翅佛骨一表卒與退之均爲當路所擠然長慶集所載古文辭實有可與昌黎頡頏者而學者祇贈炙其詩亦猶昌黎之詩實開東野玉川昌谷之先而學者祇誦其文也永叔子瞻則衰然爲有宋詩文宗主以公伯仲其閒洵可以無愧第子瞻宿直斗箕動名尤謗又不若永叔遭時賢辟得以盡忠直諫匡弼繩糾與杜富韓范諸公照耀汗青由是觀之公之學永叔之學也其遇亦永叔之遇也公之詩較勝乎永叔之詩其文之通達治體曉譬事情則全乎永叔之文也又何疑焉雖然從來鉅公大儒文字之傳亦若有天寓乎其閒公集中諸奏議皆爲

當公所採納凡評謨碩畫朝上夕報可悉見諸施行是公之  
文字其大者有裨于

國是詩詞淵雅絕倫久爲藝林傳誦雖至稗記雜著其格言  
至論足以動愚夫愚婦之信從是公之文字其小者亦有功  
于世道人心在今日已歷歷有其可傳如是况于千載而下  
有不寶之如著蔡佩之若韋弦者哉然則斯集之必傳也必  
有神物呵護以垂諸久遠其無庸子言爲嚆矢矣

康熙二十年歲在辛酉孟冬同里年家姻弟潘江蜀藻氏拜

譔

虛直軒文集

潘序

十六

廣仁堂  
壹百柒拾玖

虛直軒文集目錄

卷之首

諭祭文

諭葬碑文

敕建賢良祠

上諭

敕建本邑賢良專祠 諭祭文

神道碑文

韓序一

徐序二

虛直軒文集 目錄

潘序三

卷之一

請行選用舉人成例疏

恩詔貴在實行疏

請儲選清書言官疏

京南羣盜日熾疏

委署濫用私人疏

親政之始察吏安民疏

直陳東南水災疏

弓箭四散非宜疏

廣仁堂  
壹百貳拾肆

漕折宜沾實惠疏

請免大臣帶鎖發門疏

切陳臣子至情疏

遵查舊例以廣皇仁疏

考成奉行不速疏

開復之駁查太繁疏

流抵必載由單疏

卷之二

檢舉疏

採木有當嚴飭疏

虛直軒文集

目錄

開徵限期久定疏

各部錢糧開復宜定畫一疏

本色備辦甚難請停駁減疏

駐防兵餉疏

請復鹽差考成舊例疏

請停無益細冊疏

請停漕船展限疏

請免蘆課差官疏

卷之三

酌議官貨還官民價還民疏

敬陳鼓鑄末議疏

兩部互議請捐成見疏

開復註銷以省冗奏疏

一部之事可結徑結疏

請停 駕幸口外疏

請暫止冬狩疏

請兵餉全撥疏

請 聖躬節勞疏

請停鎖禁鎖拏之例疏

請復盜案半獲支俸舊例疏

虛直軒文集

目錄

請核贓罪相準之實疏

請定輕重畫一之例疏

永戍無併贓疏

卷之四

請早建 皇儲疏

大禮既在必行疏

敬陳邇言疏

請停今歲秋決疏

預備淮揚救荒疏

自陳不職疏

三

廣仁堂  
壹百伍拾伍

直陳曠職疏

丈量宜待農隙疏

提鎮招兵宜慎疏

長沙敘典疏

欽奉 上諭疏

閩逆狡謀疏

天方盛暑疏

中州要地疏

請廣 封典之恩疏

裁兵雖裕餉之急著疏

虛直軒文集 目錄

全秦大局將定疏

平涼蕩平在即疏

患病危篤疏

卷之五

爲人後者議

加丁末議

文冊末議

求改麥折本色呈稿

馬槽刀鍋三項宜永存府中議

卷之六

四

廣仁堂  
壹百叁拾

與蔡總漕書

又與蔡總漕書

與王君書

與張撫軍書

與姚臬臺書

與石令君書

與趙太守書

與郡伯趙興公書

再與鄒令君書

與朱雲門中丞書

虛直軒文集

目錄

與解學使書

與郎總制書

與趙郡守書

與鄒令君書

卷之七

與朱華蔭書

與李野臣書

復劉良弼書

與杳孟如昆弟書

復程賓楮書

五

廣仁堂  
壹百壹拾柒

寄方吉偶書

與王朴齋令郎書

與郎制軍書

與黃總戎書

又與黃總戎書

又與黃總戎書

與夏觀察書

復魯公書

卷之八

復張枚菴書

盧直軒文集

目錄

別葉令君書

復高念東書

與王西樵書

與彭子民書

與何湖州書

復佟中丞書

與司李書

答方甥受斯書

與江右某觀察書

寄金息齋相國書

六

廣仁堂  
壹百壹拾柒

謝魏相國書

與王西樵書

復龔合淝書

卷之九

順天鄉試錄序

山東鄉試錄序

張服公橋門試牘序

鄧夫人白湖寨序

贈黃總戎序

送蕭侍御南還序

虛直軒文集

目錄

張齡若五十壽序

鏡善彙編序

呂侯石二孺詩序

送王石仲訓導序

祭劉元功夫子文

祭季大年夫子文

祭王冰壺少宰文

祭宋艾石方伯文

祭吳玉駟都諫文

祭朱華蔭文

祭五弟文

先妣倪太孺人行狀

卷之十

戊子山東程表一道

戊子山東程策三道

祈雨壇告神文

訓子篇

題陳芝山相國手牘

題吳五崖冊後

題乳母盧氏像

盧百軒文集

目錄

八

廣仁心堂  
捌拾肆

男士暨士堂士堅士基士孰輯

禮科右給事中臣姚文然謹

題爲恭請遵行選用舉人成例以廣人才以備任使事臣承  
乏垣中查得順治元二年間各直省舉人曾經赴部選擇除  
授推知等官今多以俸薦優異見在行取考選此

興朝科甲竝用之成規而亦舉人報効

朝廷之明驗也後因三年四年連舉會試士子爭思進步於  
甲榜而赴部選者寥寥矣今鄉試履行人才日廣且上自進  
士下及貢監皆得銓除有司宣力民社惟舉人一途未盡其

虛直軒文集

卷之一

一

廣仁堂  
叁百壹拾貳

用臣請

敕下部議凡曾經會試下第舉人願以有司自効者或遵照  
元二年選用成例逐年舉行或參酌揀選舊規於每科會試  
後舉行庶可盡人才而宏任使矣爲此具本謹題請

旨

順治六年三月二十六日題本月二十七日奉

旨該部議奏

禮科右給事中臣姚文然謹

題爲

恩詔貴在實行欽恤尤所當急敬陳末議仰佐

皇仁事臣查得

恩詔之後凡刑部應赦事件立行清理牢獄一空此刑部諸臣仰體

皇仁速遵

王言之效也今

詔使出都已五月矣凡各直省該官有司亦宜遵

詔立行清理乃數月以來少有題覆應赦事件者臣思

恩詔一到之日卽諸囚再生之時而在外諸臣因地方事務煩劇不暇專理刑名且有文移往返之繁胥吏留難之弊遂使羈滯獄底度日如年或至畢命於饑寒殞身於疾疫遲之虛直軒文集卷之一 二 廣仁堂 卷百貳拾

一日則有一日無罪枉死之人是此應赦罪囚已生於朝廷之

恩詔而復死於怠玩之有司非所以宣助

皇仁也臣查去歲曾奉

旨議差恤刑旋復中止或以部寺事務殷繁則印官儘可料理其餘額員尙多或慮偶有失出則今肆赦之後正可舉行以清在外有司怠玩稽遲之弊臣請

天語嚴行申飭竝

敕部議照舊差恤刑官員清理應赦事件呈馳彙

奏其條赦之外或有罪重情輕可矜疑原宥者許專疏陳

請以聽部議仍酌地方遠近嚴定復

命限期如有遲誤並治以罪則清理有專官報完有  
欽限庶可信

恩詔而全民命矣爲此具本謹題請

旨

順治六年四月初四日題本月初六日奉

旨恩詔久頒該撫按何不速爲遵行著勒嚴限去有怠玩底  
指名參劾該衙門知道

禮科右給事中

臣

姚文然謹

題爲請儲選清書言官以通滿漢之情事

臣

備員

虛直軒文集

卷之一

三

廣仁堂  
叁百壹拾叁

殿試執事伏讀

制策首以滿漢同心合力爲念

臣

思滿漢一家感

恩報主無不同心合力之理止因語言文字各殊遂有閒隔  
難通之處前此兩科館選皆有清書已見

聖明遠慮矣但以選員無多僅充編纂故未有改授別衙門  
者

臣

請於新進士內廣選庶吉士其讀清書與讀漢書者一

體嚴加遴選察其品行之端方相其年力之強壯考其學業  
之優長務得眞才以儲

國用待教習旣成亦與漢書庶吉士一體改授科道等官或  
備不時

召對據情直啓可省轉譯之煩或出而巡方亦便與滿洲駐防撫鎮諸臣言語相通以收同心合力之效况今科

覃恩廣額俱照丙戌名數則取才不患乏人而致治實爲要著敬因

制策直陳末議伏乞

聖裁

睿鑒施行爲此具本謹題請

旨

順治六年四月十九日題本月二十一日奉

旨該衙門知道

虛直軒文集

卷之一

四

廣仁堂  
卷百六拾陸

禮科右給事中

臣姚文然謹

題爲京南羣盜日熾謹酌直省地勢俯陳控制機宜以奠根

本以救民生事

臣

伏見北直隸接壤山東河北一帶盜賊日

熾通衢阻塞商賈不前耕桑廢時小民失業兵到則東剿西

遁兵撤則勾連復起

臣

熟籌其故由地勢接連兩省兵馬各

有分疆在巡撫無調遣總鎮之事權而總鎮亦無越境窮追

之剿法是以狡賊得東西躲閃逋緩

天誅

臣

思若倣江南川湖三邊之例卽將眞保巡撫改爲總

督衙門其標兵官吏廨宇公費一毫不煩另措但慎推威望

大臣重其事權舉直隸山東及河北懷慶衛輝彰德三府悉

歸統轄兩省巡撫總兵悉聽節制則狡賊出沒總督可調遣  
各鎮兵馬合力會剿或扼其前或截其後剿有全局賊無走  
路此息盜安民肅清

畿輔之要著事不繁而功甚大者儻臣言可採乞

睿鑒敕下酌議施行爲此具本謹題請

旨

順治六年八月初十日題本月十二日奉

旨依議行卽會推堪任底來用該部知道

禮科右給事中臣姚文然謹

題爲委署濫用私人藐法縱蠹可駭據實糾參乞

虛直軒文集

卷之一

五

唐仁仁堂  
卷百伍拾壹

嚴察通飭以除害民積弊事臣聞歷來舊例凡州縣正印缺

員其委署必用本省首領佐貳等官蓋印係

朝廷之印則官必委

欽選之官若本非職官公然委署是以外臣而侵部選之權

以私人而署民社之任藐法干紀莫此爲甚矣臣向痛秦中

吏治大壞委署陋習恣行聞有撫臣黃爾性之內戚而署印

者則署郿縣之程伯起是也有省城開當舖之人而署印者

則先署同官縣後署同州之陳猷是也有本省之人託稱劄

委而署印者則署扶風縣之馮捷是也臣以風聞未確不敢

入

告及至吏部發臣等科中公同諮訪冊至臣細閱陝西全省  
三年內見任去任大小各官并無程伯起陳猷馮捷等三人  
姓名又詢閩戶科所收陝西三年內錢糧印冊則程伯起署  
鄆縣陳猷先署同官再署同州馮捷署扶風到任離任年月  
日具存可考臣未聞有此不奉

欽依不由部選之人而可公然委署縱蠹殃民者也以門下  
之私人署

朝廷之正印藐悖行私若此中間情弊顯然請

敕吏戶二部立查部冊詳覆并

敕督臣孟喬芳確察擅委何人濫委何弊據實回

虛直軒文集

卷之一

六

廣仁堂  
貳百捌拾玖

奏仰聽

聖鑒處分仍乞

嚴行通飭以除委署害民大弊天下幸甚爲此具本謹題請

旨

順治七年正月二十六日題本月二十九日奉

旨著確察議奏該部知道

工科左給事中臣姚文然謹

題爲

視政之始敬陳察吏安民之首務直明風憲弼職之本原仰

祈

聖斷以佐澄清事臣伏讀

皇上親政明詔懋懋於民間利弊必使

上聞

朝廷恩意期於下究臣謂

皇上欲使上下有不隔之情當使內外有相通之勢臣愚以

爲巡行察舉其首務矣

朝廷設官內外分理部院大臣不能出外督撫重臣不能入

內惟巡按一官出奉

王命有弊必糾入侍臺班有聞必

告所以疏通內外察吏安民爲任甚重故前此大臣會議將

虛直軒文集

卷之一

七

廣仁堂  
叁百壹拾玖

巡漕巡倉引部徑議革撤惟巡按一差獨議暫停停差則見

其不可裁暫停則見其不可久停差之後他處臣不能知卽

如臣鄉巡按張慎學撤回之時貪官衙蠹喜無忌憚臣鄉大

小諸臣可問又如江西全省大亂初定舊撫臣朱延慶於去

年九月十九日病故今新撫臣會推未久入境尙遲相隔半

年有餘中間貪官衙蠹誰人糾參刑名

欽件誰人審結總無一

欽差之官可飛章入

告者諸如此類臣竊憂之雖欲民間利弊

上聞何可得乎我

皇上親政之初正四海瞻仰之日故臣謂察吏安民在

特遣巡行始也若

皇上慮巡行不得其人如前此大臣所議澄清無效者

臣謂

此與巡按之差無涉實因巡按之不得其人巡按豈盡失人  
總因都察院大臣之溺職也巡按出有差規入有考核整肅  
憲綱全在堂上官卽如諸大臣會議停差言其供應煩多承  
役騷擾官民共苦等弊時都察院本衙門堂上之官卽議本  
衙門之事書名公奏不敢置辯明明認罪無辭矣憲臣負罪  
若此不聞引咎自退巡按失職若此不聞指名糾參半年以  
來不聞疏請甄別

虛直軒文集

卷之一

八

廣仁堂  
卷百柒拾陸

皇上親政之始不聞請

旨特遣坐使

朝廷察吏安民之大典停格於二三澄清罔效之匪人徇私  
溺職莫此爲甚請

皇上詰問憲臣召羅徐起元等堂上啓心郎洪朱喇喀等都  
察院一衙門滿漢憲臣八九員又有啓心郎等及理事僉堂  
近十員率御史近五十員賢者憤悶無以自立不肖者覲顏  
有以自容衙門設立何爲風憲職掌何事堂官愈多憲綱愈  
壞不加澄清何以昭

國法

臣

故謂欲巡行之得其人宜自澄清都察院諸臣始也

臣遵

詔任怨干犯權要乞

皇上睿鑒下內院六部大臣會議如諸大臣以臣言為妄請

皇上萬幾之暇

俯賜

召對容微臣一人與諸大臣面議異同各竭臣忠可否請自

聖斷臣不勝激切之至為此具本謹題請

旨

順治八年二月十八日題本月二十二日奉

聖旨著會議具奏吏部知道

虛直軒文集

卷之一

九

廣仁堂  
貳百捌拾陸

工科左給事中臣姚文然謹

題為直陳東南數十年未有之水災請量折來歲必不能完

之漕米

敕部酌議變通以下蘇民命上不誤

國儲事臣惟

國家經制每歲運東南漕米數百萬石以實

京師計費數石而運一石蓋以東南為出米之鄉西北為用

米之地通其有無以備荒歉故不計道路轉輸及船閘人夫

之費也至於今歲則與往年時事大不相同臣請迫切陳之

今歲江南浙江一帶水災異常見經撫按諸臣屢疏入告

聖心憫惻奉

旨察議而近時崑山吳江各縣士民亦以水災奇荒匍匐數千里伏

闕上疏據所聞見苦不忍言至於直隸河南等處皆年歲豐熟夏麥秋禾價值甚賤亦爲數年所未有是東南反苦於無米而西北不患於無糧此天時與往年不同者一也又數年來漕政積壞兌米水次將銀折米留米於南挾銀而北名曰折乾故南有餘積之米北多掛欠之糧我

皇上親政漕務肅清盡革折乾之弊糧米顆粒登舟計今歲抵通者較前兩運可多米百十萬石是東南之積米一空而

虛直軒文集

卷之一

十

廣仁堂  
參百玖拾伍

京通之儲藏宜倍此人事與往年不同者一也方今江浙大水一望汪洋田不得耕米從何出米不得收糧從何徵七月尚報水災九月便徵漕米是今年極力徵米米無可徵明年百計催漕漕必多欠民困旣不得蘇

國儲又必至誤臣待明歲爲

皇上言之晚矣臣考漕運議單一款各直省遇有災傷奏留

奏免改折又一款災傷改折漕糧查被災八分以上七分以

下分別折價具有成例臣請

敕部速議將江浙漕米量行改折酌定分數價值下該督撫

按察勘所屬地方以被災之重輕爲改折之多寡勿使災輕

者折多災重者折少致苦民不霑實惠且今歲漕米抵通者數溢往年乞

敕部細查兌放若干餘堪收貯京通倉若干以備來歲湊給軍糧之用又西北各省大熟糧價甚賤或將漕米改折銀兩及省出腳價等費催解貯部以備一時收買雜糧之資如此則

國儲不誤民命得生通變權宜計無出此不然今年不議改折明年便成掛欠紙上索糧不可充飢欠後追銀不及措餉東南財賦之區災傷之後逃亾日多隱憂方大臣疏具在言

責盡矣事關重大貼黃難盡仰祈

虛直軒文集

卷之一

十一

廣仁堂  
卷百叁拾柒

聖鑒施行爲此具本謹題請

旨

順治八年八月十六日題十七日奉

聖旨戶部速議具奏

工科左給事中臣姚文然謹

題爲弓箭四散非宜請

旨停發以防盜源事臣見近日城市內外賣弓箭者甚多每

弓一張每箭百枝止賣錢百文或數十文不等聞係

內庫舊藏弓箭發散各旗旗下各丁不用南弓竹箭勢必賤賣價賤則販買者必多貨積則轉載而四出臣竊以爲非宜

也今年直隸山東河南等處或苦河決或苦水潦歲歉民窮盜賊易起且一人用錢二三百文便得弓二張箭數百枝較刀鎗等器既省十倍之錢又能殺人於百步之外以之截商劫村爲勢甚便爲害不小臣請除從前已發者不宜追論以滋紛擾外此後

丙庫所藏弓箭勿再發出著爲永令亦弭盜豫防之一端也伏乞

聖斷施行爲此具本謹題請

旨

順治九年八月初三日題本月初四日奉

虛直軒文集

卷之一

十一

廣仁堂  
東日捌拾貳

聖旨著酌議速奏兵部知道

工科左給事中臣姚文然謹

題爲漕折已遞

聖恩奉行貴在切實請

旨速飭以防溷冒事臣惟我

皇上軫念南北災荒俯

允部議量折漕米且

天語諄諄務令災黎均沾實惠

堯舜猶病之心何以踰此臣愚謂惠本出自

朝廷而令民沾實惠者則有司奉行之責也蓋漕折款項既

多規則新立小民難以周知官吏易於作弊且米價甚貴折價稍賤多寡之際卽有侵漁進速之閒便生朦溷或有旣折正米復將免折耗米濶算入隨漕銀兩項下一同徵折是旣徵改折正米之銀又徵免折耗米之銀也此謂重折之弊或有先徵漕米及改折文至不肯退米於民託言候別項銷算反再徵折價是旣徵米又徵銀也此謂重徵之弊或府縣戶書表裏爲奸將布政改折文書暗行停閣先期嚴比勒限正耗米全完然後張掛藩文折銀彙解是百姓所納官者重價加耗之米而官所解布政者輕價無耗之銀也此謂先後挪移之弊或有一府一縣之中折數本多而貪官奸吏詭言折

虛直軒文集

卷之一

十三

廣仁堂  
肆百壹拾

少希圖多徵漕米巧肥私橐是百姓所輸重價之米其數不全納於

朝廷而

朝廷許折輕價之銀其

恩又不盡沾於百姓也此謂多寡朦溷之弊如此弊端不一

皆臣 鯁鯁過慮恐災黎不得沾實惠者此也方今總督漕臣

剔釐夙著巡漕臣叱馭方新有弊必燭有聞必糾但臣 以爲

糾繩於事後不若嚴飭於事前請

敕各省藩司速將戶部改折全疏及某府某縣改折漕米若干石細數一同刊示勒定期下之郡縣頒之學宮使地方

處處張掛百姓人人知曉又耗潤米一項最易濶徵本年二月二十一日戶部題覆遇災改折止折正米原無竝折耗潤等米之例自應免徵奉

聖旨是欽遵在案再祈

天語明行申飭其有郡縣奉行不實巧於作弊者總漕巡漕及該督撫按諸臣立以白簡繩之而今歲江南浙江江西山東河南五省按臣正同時奉

命出京其躬巡郡縣之時體察更易糾劾必嚴庶災黎均沾實惠不負

天語之叮嚀矣爲此具本謹題請

旨

虛直軒文集

卷之一

十四

廣仁堂  
貳百玖拾貳

順治九年十一月二十六日題本月二十八日奉

聖旨著嚴飭行如有這等情弊漕運總督巡漕御史及該督撫按指參重處不得朦蔽溺職該部院知道

工科

愛惜喇庫哈方臣散 郝謹  
左給事中臣姚文然謹

題爲

聖恩浩蕩如天愚忠不敢不盡敬陳芻蕘以廣

皇仁以存

國體事

臣等元旦朝

賀之後叨蒙

聖恩均沾

賜宴感戴無極復

特宴院部卿貳諸大臣於

內殿而臣衙門六科都給事中亦與其內

天顏咫尺

恩隆情渥仰戴我

皇上優禮大臣及厚待言官至意雖古堯舜時上下一德一

心之盛何以加此

皇上待大臣若此其優而大臣不能竭力報効是大臣負

朝廷也

盧直軒文集

卷之一

十五

廣仁堂  
參百壹拾玖

皇上待言官若此其厚而臣等猶避忌不言是臣等負

朝廷也臣有愚忠敢一陳之臣惟

朝廷之待大臣平日則遇以恩使竭其力有罪則存其體使

愧其心唐太宗皇帝時嘗引囚至岐州刺史鄭善果唐太宗

曰善果官至五品不爲卑矣今雖有罪豈得與諸囚爲伍敕

自今五品以上犯罪聽於朝堂候旨又自成周以來歷代帝

王及會典開載至

本朝大清律皆有八議之法其曰議功者言有能或斬將奪

旗或開拓疆宇有大勳勞者也其曰議貴者言爵一品及文

武職事官三品以上者也凡此八議之人非犯十惡大罪其

犯他罪俱與平人不同以見大臣雖有負

朝廷之事而

朝廷終不失待大臣之體恩至厚也臣聞近日兵部滿漢諸

大臣皆因負罪鎖禁發門臣深恨其身爲大臣有負

皇上宏恩但念諸臣皆官列大僚素叨參養今寒天凍夜冷

鎖三重寢食艱難便利不寧恐有衰年老慮之人積成疾病

是不死於

國法而或死於天災非所以廣

皇仁也且發在各門上通衢大路萬目觀瞻功臣貴臣免冠

帶鎖愧辱難堪非所以存

虛直軒文集

卷之一

十六

廣仁堂  
貳百玖拾卷

國體也臣知我

皇至上至仁至慈念及於此必有惻然不忍者矣臣愚謂大臣

有犯自可發於刑部令人看守待其審明案定治以應得之

罪免其帶鎖發門以明

朝廷優待大臣雖經犯罪猶與平人少異則

國法

聖恩並行不悖如雷霆雨露並降自

天非臣下之所敢望也儻

皇上以臣言爲愚忠可採

國體有關仍乞

著爲永令使傳之天下垂之史冊謂

恩禮大臣永除帶鎖發明之令自我

皇上而始雖宋太祖傳國戒碑不足爲美矣豈不盛哉蓋

皇上立心欲爲萬世第一聖君

皇上立法當貽萬世第一良法臣區區之忠非止爲一時一

事言也臣當

皇上明法敕罰

天威震赫之下而不敢不盡愚忠者以

皇上厚待言官至於

宴樂一堂

虛直軒文集

卷之一

十七

廣仁堂  
貳百陸拾陸

恩同覆載又新奉

上傳許以直言無罪不忍不圖報効於萬一也事關重大貼

黃難盡統祈

聖鑒施行爲此具本謹題請

旨

順治十年正月初六日題本月初九日奉

聖旨這本說得有理以後滿漢諸臣有犯貪惡重大事情應

發刑部審問者在部守候不必鎖拏送門審有實據引律擬

罪奏請處分該部知道

兵科都給事中臣姚文然謹

奏爲切陳臣子至情仰祈

聖恩兪允以廣

孝治事臣惟我

皇上以孝治天下

恩詔推錫類之仁使臣子得遂省親之願

曲體下情

德澤深厚又見我

皇上孝思篤至格於

在天凡爲人臣人子誰不感動涕零切念臣濫列清華自慚

瘵曠服官京邸已邀七載之

虛直軒文集

卷之一

十八

廣仁堂  
貳百柒拾柒

皇恩臣父母遠在家鄉未盡一日之孝養每一念及中夜徬

徨又臣父今歲寄臣書言臣母年來多病舌本時時強硬心

中時時朦朧臣每捧家書憂思鬱結無可告語臣惟人窮則

呼天疾痛則呼父母當我

皇上孝治天下之時臣有此實情敢不實陳於

皇上之前乎仰祈

聖慈給假歸里省親臣朝夕頂踵皆感

天恩矣至於臣七載睽離依戀膝下臣母多病恐非旦夕可

望平復臣雖有兄弟侍養難代臣身難代臣身難代臣心儻

蒙

皇上格外之恩準臣終養則臣年三十有四報

國之日方長既盡孝養再矢捐糜自此有生之日皆圖報之年又臣之至情迫切而不敢直陳者也

聖恩未報遽訴私情亦以幸逢達孝之

聖主敢陳烏鳥之微誠拜奏涕零無任戰慄待

命之至爲此具本謹具奏

聞

順治十年五月十七日奏本月十九日奉

聖旨該部知道

戶科給事中臣姚文然謹

虛直軒文集

卷之一

十九

廣仁堂  
貳百柒拾柒

題爲遵查舊例以廣

皇仁事臣叨與

朝審之末見今歲秋決重犯較往年人數眾多深可哀惻因

查順治十六年江南道監察御史羅璧等題爲處決重囚事

內稱該刑部遵將情真各犯通綁押赴市曹該臣等遵照舊

例開列重犯花名具題伏乞

睿裁擇其情罪重大者

御筆酌賜勾除

敕下臣等遵奉

御勾以便行刑其餘仍發回監候等因奉

旨勾了底便決了餘著牢固監候臣竊思歷來舊例  
朝審之後各犯綁赴市曹之時雖已情真罪當猶必開罪犯  
之花名請

御筆之親勾總以民命至重死者不可以復生

仁主好生者不忍其立死且各犯內情皆真矣而情之中  
又有重輕罪皆當矣而罪之中又有小大舊例情罪重大者  
御筆酌賜勾除便行處決其餘仍牢固監候不過少緩其一  
時之死使天下臣民仰見

皇上惻隱之心究未嘗縱釋以虧

朝廷之法况當

虛直軒文集

卷之一

二十

廣仁堂  
貳百玖拾肆

御筆勾除之時費

聖心幾回矜憐將情罪幾番斟酌我

皇上春秋方盛仁政日新推廣此

一念好生之心實培養

國家萬世無疆之福先儒孟軻曰以不忍人之心行不忍人  
之政治天下可運之掌上所關甚大原不止爲此一時一事  
起見也臣謹仰體

皇仁查例

題請伏候

睿鑒酌賜施行爲此具本謹題請

康熙五年十月十八日題本月二十四日奉

旨秋決人犯九卿科道會同詳審情罪可疑可矜者減等情  
罪真者卽行正法此係定例姚文然孫際昌既在會議之列  
各犯內果有情罪可疑可矜底卽應於會議之處說出今請  
緩決自爲仁慈市恩於下具奏殊爲可惡著吏部議處具奏  
戶部給事中臣姚文然謹

題爲考成之奉行不逮

國賦之逋欠日多請

敕部酌議責成巡撫之法以信考成以速

虛直軒文集

卷之一

二十一

廣仁堂  
卷百貳拾玖

國課事臣思

國家所重者錢糧而錢糧之完欠全係於有司之考成其初  
次未完者該撫題參該部按其未完分數或停陞或降級革  
職俱戴罪督催在案其參後續完者該撫

題報戶部覆準

敕下吏部查銷謂之開復有懲有勸立法甚善也使各官舊  
欠一完便可開復不礙陞轉則各爲自己功名必急於催徵  
以完

國賦而逋欠有不早完者乎臣辦事垣中見

題報章疏如繁時知縣戴璽未完順治十七年錢糧本官於

順治十八年及康熙元年正二月內起解全完直延至康熙六年三月內始行

題請開復又如會昌知縣王志整未完順治十八年錢糧卽於順治十八年十二月內起解全完直延至康熙五年九月丙始

題請開復已經戶部駁查其餘若此等類恐正不止此也則此完糧以後未開復以前此數年中間各官舊欠雖完而停陞降級革職戴罪督催俱如故也本無可催而部冊仍註督催本無罪而部冊仍註戴罪已完之官與未完之官一例沈滯不得陞轉宜乎勞吏灰催徵之心逋欠無早杜之日也

虛直軒文集

卷之一

三五

廣仁堂  
卷百捌拾捌

愚以謂有司開復一事原係巡撫專責但因舊例相沿未定有一年必結之期是以有數年不結之案今欲徹底稽查惟在每年帶徵考成一冊蓋帶徵冊者專爲查歷年舊欠之續完與仍未完而設也其冊內原有仍未完各官職名分數亦開列續完各官職名分數其未完各官該撫既有接參其續完各官該撫自應

題請開復庶幾賞罰分明人知懲勸以

國賦而論無不算欠又不算完之糧以

國法而論無既不接參又不開復之官也今因開復無有定

限任憑該撫

題報該撫又候各經管錢糧衙門申詳其該經管衙門又候有司自具申詳竊恐過一衙門卽有一次使費經一番駁查卽需一番打點以致文移往返耽延歲月者皆不可定其弊可勝言耶臣思有司求上司開復甚難責成上司爲有司開復則易非爲有司也爲

國課也

臣請

敕部酌議行各該巡撫申飭各該經管錢糧衙門於各官續完錢糧解交貯庫給與批收之日一面星速申報以憑該撫陸續具題其一切經管錢糧衙門縱有奸胥猾吏但能留難有司誰敢留難巡撫自然文移迅速雷快風行而部中於帶

虛直軒文集

卷之一

三三

廣仁堂

卷百柒拾壹

徵冊到時將巡撫一年內

題報開復科抄逐一查閱如冊內報有續完各官職名而該撫未經具題者卽行摘參如此則開復一案疏題於前冊報於後互相稽核一年定結一年之局安得有如從前完糧五六年而不得開復之案哉從此勞吏踴躍於催徵積欠因之而早杜當此錢糧匱乏之時所關非小臣一得之愚乞敕部議施行爲此具本謹題請

旨

康熙六年閏四月二十二日題二十七日奉

旨該部議奏

戶科給事中臣姚文然謹

題爲開復之駁查太繁章奏之煩瀆日甚請

敕部酌省以鼓勞吏以速

國課事臣辦事垣中見每月本章較往年多至數倍細思其故總由於駁查之太多而戶部駁查本章惟開復一項爲尤多甚至有一駁以至屢駁內外往復疊瀆

宸聰一案而數年不得結者在部臣以錢糧爲重務詳慎爲

盡職凡事駁查再三不過小心敬謹之意而臣竊有議焉蓋

戶部較別衙門原屬繁難其錢糧款項既已多端卷案動連數載凡事宜省之於始譬之藤根既斷藤蔓不生卽如開復

虛直軒文集

卷之一

三十四

廣仁堂  
肆百叁拾貳

一事總以錢糧之完解爲主其閒有必應駁查者有不應駁查者臣請得而詳言之如開復疏冊內續完錢糧與原參數目不符者應駁年月舛錯者應駁未報明解司日期未註明領有批收字樣者應駁至於錢糧完訖解訖該撫

題報明白則無可駁矣而部中又或駁查其續完銀兩作何支銷行令該撫再題夫駁至支銷款項既已頭緒繁亂無有了期何況支銷款項該撫登答明白又駁云未經奏銷難以查核候奏銷到日再題耶錢糧各有職掌其徵收完解者有司之責也解到藩司領有批迴之後而有司之事畢矣此後支銷不清宜問之藩司奏銷不清宜問之督撫此與有司何

涉今開復疏內爲此一駁屢駁是以藩司督撫之事而問之  
有司矣豈不可省耶臣又見近日部覆山東巡撫周有德自  
請開復一疏其覆疏中先云未完銀兩既經該撫查明全完  
造冊

題報則巡撫原參停陞之案請

敕吏部查銷後云續完銀兩支給鎮標康熙六年分餉銀一  
千五百兩俟年終奏銷到時查核以此推之則凡各官開復  
不必待奏銷之後明矣部覆又云其餘銀兩支銷各款仍應  
備細開報以憑查核則以此推之凡各官開復不必待支銷  
開報之後又明矣然則部中於開復事例原可簡明直截特  
虛直軒文集卷之一  
三五  
廣仁堂  
參百案拾貳

撫之

題報同一巡撫也爲自身

題報開復則足信爲各有司

題報開復則不足信必需駁查同一奏銷也支給餉銀一千  
五百兩爲數甚多既可候奏銷先準開復至各有司案內  
如泰興知縣李馨所完銀九十兩據該撫

題報補還康熙五年協餉訖邵武知府汪麗日所完米二十  
五石據該撫

題報支給康熙五年兵米訖俱爲數甚少反蒙駁查必候奏

銷到時再是不卽准其開復如此之類非考成畫一之法也  
臣愚以爲此後部覆開復本章當皆以所覆東撫周有德之  
疏爲式其有司開復但經該撫

題報完解明白者先請

敕下吏部查銷其支銷奏銷各項專責之藩司督撫與有司  
無涉其餘有不應駁查款項槩從簡省則章奏無煩瀆之擾  
考成有畫一之法鼓勞吏而速

國課所關非小如臣言不謬伏祈

敕部酌議施行爲此具本謹題請

旨

虛直軒文集

卷之一

二十六

廣仁堂  
卷百貳拾玖

康熙六年閏四月二十二日題二十七日奉

旨該部議奏

戶科給事中臣姚文然謹

題爲流抵必載由單蠲免方沾實惠敬陳一簡明可行之法  
以杜官吏侵冒之弊事臣惟蠲免災荒係

朝廷至大之恩除本年應蠲錢糧卽於本年扣免外亦有本  
年納戶之錢糧收完在前奉蠲在後則以本年應蠲伊等錢  
糧抵伊等次年應納正賦名曰流抵此乃

朝廷爲民委曲體恤德意若不使人人均沾實惠則蠲免徒  
有虛名豈不虛

朝廷大恩乎欲使人人均沾實惠必須將流抵一項填入由單蓋由單者各州縣每年每戶各頒一單以爲徵糧之據戶戶皆有人人盡知故名曰易知由單也臣查康熙二年內戶部覆科臣史彪古由單關係國賦等事一疏內稱各直省應蠲免錢糧流抵次年者如科臣所請填入次年由單請敕各直省巡撫嚴飭通行奉有

俞旨遵行在案誠以由單爲最重也及臣查康熙五年分各直省已送到臣科奏銷冊內除山東蒙

恩全蠲外其餘各直省康熙四年蠲銀應流抵康熙五年正賦者約有十數萬兩又查各直省送到臣科康熙五年由單

盧直軒文集

卷之一

三七

廣仁堂  
雖百貳拾貳

互相查對竟未有開載流抵一項者臣竊異之以爲奏銷冊者報於

朝者也既有流抵一項由單者頒於民者也因何又無流抵一項豈各地方官竟皆不遵

旨奉行耶再四思維而後知流抵一項不填入次年由單者非盡地方官之不奉行也勢不能也何也部題定例次年由單於上年十一月頒發里民計該州縣磨算錢糧數目款項造成式樣送布政司磨對必須在上年九十月間而各撫題報災傷夏災報在六月秋災報在九月計題報到部又需月日部中具覆行查被災分數花戶去後必候該撫查回再題

部覆奉

旨然後行咨該撫又轉行各地方官極速已是本年十一月及次年正月二月閒久已在頒發由單之後矣何從填入乎是則流抵一項究竟無填入次年由單之法也流抵竟不填由單則部中所取者地方官印結耳然印結不過出於官吏之手民間未必知也又所申飭該撫不過大張告示耳然不肖官吏或有匿告示而不張掛者卽張掛不過數日城市知之而遠鄉愚民安得人人盡知也竊恐貪官奸吏因此侵冒者不少矣臣思之又思流抵一項不填入由單則不可欲填入次年由單又必不能則於開徵之前曉諭里民之法已窮然既必不能曉諭於前亦必立法稽查於後唯有於流抵之下年填入由單之一法譬如康熙五年免災錢糧應流抵康熙六年者自應於康熙六年抵免訖卽於康熙七年由單之首填入一款內開某府某縣於康熙五年分蒙

皇恩蠲免本縣重災田若干畝每畝免錢糧十分之三或次災田若干畝每畝免十分之二輕災田若干畝每畝免十分之一合縣共該免銀若干兩除本年已免若干兩外尙該流抵銀若干兩俱於康熙六年分內於原被災本戶名下額賦各照分數流抵訖并無官吏侵欺等情此後方列入康熙七年分地丁額賦等項譬如奏銷冊內各州縣錢糧先開上年

舊管之式也如此則由單之上增刊不過百餘字而

朝廷應蠲之分數與本地方已抵免之銀數每戶各執一單  
一目了然蓋明布

朝廷之大恩刊載於由單之上卽暗取有司之結狀分送入  
百姓之手儻有不肖官吏將上年被災各戶額賦未與流抵  
及流抵而短少不全者災戶卽可執此白單赴上控告卽有  
富而懦之民不敢赴控然上年溢完之銀雖不能退還而本  
年應納之銀亦可扣算此法一行則卽有不肖官吏於流抵  
之年雖欲隱匿肥己而恐有下年之告發亦預有所忌憚不  
敢恣意肆行矣至於有應蠲免本年錢糧卽於本年蠲免者  
虛直軒文集 卷之一  
三九 廣仁堂  
肆百貳拾肆  
則本年由單頒發在上年錢糧蠲免在本年愈無從填入相  
應亦於蠲免之下年由單之首照依此式填載明白但改流  
抵字樣爲蠲免而已立法不難行之甚易也而更有要緊稽  
查一著則在每年由單到時其中有蠲免流抵款項該部科  
將上年奏銷冊內某州某縣所開蠲免流抵銀若干兩米豆  
若干石顏料麻膠等若干斤逐一磨對如有冊內報數多而  
由單上開數少者卽行指參查結如此則冊與單畫一上之

奏報

朝廷者有此數下之頒發百姓者亦同此數一兩一錢不得  
參差官吏無所容其侵冒不虛

朝廷至大之恩矣又臣查康熙四年五年分錢糧應流免康熙六年分者約計有數十萬兩今時已仲夏百姓沾恩正在此時祈

敕部速議通行使有司知

朝廷立有稽核之法便可預遏其假冒之心事關錢糧語多瑣碎字復踰額貼黃難盡但以

朝廷數十萬錢糧蠲抵須有實用地方數百萬黎庶蠲抵須受實惠所係重大故寧冒繁瀆不厭詳明統乞

鑒宥採擇施行爲此具本謹題請

旨

虛直軒文集

卷之一

三十一

廣仁堂  
壹百玖拾貳

康熙六年五月初四日題初九日奉

旨該部確議具奏

虛直軒文集卷之二

桐城姚文然若侯

戶科給事中臣姚文然謹

題爲檢舉事查得戶部於康熙六年正月內覆安撫張朝珍  
懇電錢糧等事一疏內稱該撫疏內開江寧知府陳開虞事  
在

赦前行查去後今臣於本年五月內磨對康熙五年十二月  
錄書將

紅本較閱其該撫本內原寫陳開虞事在

赦後則此訛後字爲前字係臣衙門發抄失於磨對之咎與

虛直軒文集 卷之二

廣仁堂  
卷百零肆

該撫無涉但該撫原本已發存在臣科臣若不聲說明白該

撫無由知其原本不錯理合檢舉又查發抄簿此日係臣發

抄與同科漢官無涉又發科抄內該撫看語并貼黃滿漢字

俱無錯誤此所訛漢字在全抄內其滿字舊例不寫全抄無

從磨對則此與臣同科滿官亦無涉其磨對不詳之咎獨在

微臣一人伏乞

敕部察議施行爲此具本謹題請

旨

康熙六年五月初四日題初九日奉

旨該部議奏

戶科給事中臣姚文然謹

題爲採木有當嚴飭者三請

敕通行採木地方督撫以省官役借名詐害累民之弊事臣

聞

朝廷安民之道在於省事而已然有必不可省之事則當就  
此一事之中思其借事生端苦累小民者而預禁之則事行  
而民不擾事畢而民不困臣見近日工部題疏內照會典開  
載於四川湖廣江西浙江四省并新增江南一省共五省地  
方查採大楠木以備大工之用此所謂必不可省之事也但  
臣向在田閒風聞各省造船採木一事除有司之賢者自然

虛直軒文集

卷之二

二

廣仁堂  
肆百貳拾柒

奉行無弊其不肖官役有借事嚇詐之弊二有假公行私之  
弊一敬因採木而詳陳之一曰民間宅內之木原自不多有  
不肖官役指稱封取小民思量若採此木必須毀牆折屋方  
可搬運其費甚多勢必用錢賄買求免所謂借事嚇詐此其  
一也一日民間墳墓之木在地理風水之說以護墳之木爲  
最重一有砍伐則震驚墳墓子孫受殃有等不肖官役訪知  
地方有富民墳墓在於某處便出票行查有無木植若用錢  
則免不用錢則封記砍伐小民因墳墓所關只得費錢求免  
所謂借事嚇詐此又其一也一日不中式之木蓋部中採木  
原有定式木有一定名色又徑幾尺長幾丈尺方爲合式有

不肖官役除將中式木植應行採運外又將不中式之木借  
名多採喚集民夫或自山中運至城邊或自鄉村運至水次  
或打造器具留入官衙或打造船隻以獻上司所謂假公行  
私此其一也臣閱工部疏內云需用大楠木則不採別樣木  
植明矣又云該督撫查見有採就木植或山中出產木植則  
不採墳間宅內之木又明矣又云查長徑尺寸根數需用錢  
糧確估報部則長徑尺寸不中式之木不行採取又明矣但  
部中咨文與督撫牌票不過行於州縣而止民間耳不得聞  
目不得見何由知某項木爲應採某項木爲不應採乎以致  
不肖官役及上司差官奸商土棍借名生事小民苦累無窮  
虛直軒文集 卷之二

臣請

三

廣仁堂  
肆百肆拾

敕下各該督撫於所屬地方一面嚴飭一面體訪儻有因採  
木而生事擾民如前所言等弊者特行題參仍給發告示遵  
照部文備載民間宅內之木不採墳間之木不採不係楠木  
及長徑不合式者不採並嚴檄州縣官照樣刊刻務使城市  
鄉村通行張掛曉諭不許藏匿如此則民間曉然知某項木  
爲應採者應公家之用某項木爲不應採者不至受官役之  
欺雖有不肖官役欲借端嚇詐假公行私既畏上司之察訪  
又慮民間之告發其勢不可行其弊亦自止矣臣因事關五  
省之廣故陳一得之愚伏乞

睿鑒採擇施行爲此具本謹題等語

旨

康熙六年六月二十一日題本日二十六日奉

旨據奏五省地方察採大楠木以備大工之用不肖官役上司差官奸商土棍借名生事小民苦累等語作何嚴禁該部詳議具奏

戶科給事中臣姚文然謹

題爲開徵之限期久定來春之兵餉宜籌請

敕部速議使軍需毋誤民困永甦事臣伏念我

皇上愛民緩徵夏稅定於五六月秋糧定於九十月此前遵

盧直軒文集

卷之二

四

廣仁仁室  
叁百伍拾伍

古帝王歷代沿行之成法而後開

國家千萬世之良規

皇仁天大民悅雷呼誠盛事矣但臣見年來各處兵餉俱動

本年所徵銀兩爲支銷本地及撥協別省之用見今順天撫

臣甘文焜疏請撥各鎮兵餉限期及山西撫臣楊熙疏請解

各省協餉限期俱蒙部覆

敕下該撫照限開徵隨收隨解毋誤軍需在案臣查催徵兵

餉舊例四月內完三分之二八月內全完今兩撫臣所請者

不過三分中之一分爲數既少且舊限完餉在八月新限開

徵在九月相去時日不甚相遠或可隨收隨解不誤軍需若

明年兵餉開支在於正月而民糧開徵在於五六月相去將及半年安能隨收隨解不誤軍需乎臣查每歲兵餉約計二

千餘萬以一季算之應得五百萬除今年各處裁兵節餉定

額未到難以預算約畧計之明春一季餉銀恐尚需四百萬

也臣又查各省錢糧除地丁外其餘最多者爲鹽課次則關

稅又次則蘆課錢息當稅等項有定額之銀每歲約共三百

九十萬餘兩然或按季徵收或逐月收取合之雜稅贓罰原

無定額等項約畧來春一季所入不過百萬餘兩合計來春

一季所入較一季所出尙需預措三百餘萬兩若待臨時督

撫題請則軍需孔亟勢不能爲無米之炊恐將

虛直軒文集

卷之二

五

廣仁堂  
肆百肆拾

恩綸定限不得不又議變更豈不虛我

皇上愛民緩徵之良法美意乎臣請

敕下該部速行酌議通查各處今歲兵餉已撥過若干算除

裁過兵餉應扣貯餘贖者若干以備來春兵餉之用並查各

處變價銀兩從前駁回增估有至數年不結者計每次駁出

所增估價無幾應否速允速解或就本省撥本省以備來春

兵餉之用又查裁官經費銀兩新經裁缺應扣貯者若干以

備明春兵餉之用將今歲所餘贖存貯款項與明春可徵收

款項通盤打算果否足來春一季兵餉之用儻再有不足必

須細加籌畫酌議變通或借發

帑金約計明年兵餉新經裁汰之後應有餘贖明歲秋冬可以抵補蓋從前賑荒發

帑尙且蒙

恩徑蠲此則不過暫借也或暫開事例俟明年錢糧開徵秋冬之後永行停止蓋從前暫開事例以濟大兵進取一時之急用此則暫開事例以成就愛民緩徵萬世之良法皆權宜之計也至各部向戶部取用銀兩酌議有可緩事務應緩至來秋舉行諸如此類非臣愚昧所能盡知統在部臣詳籌備列奏請

睿裁總之此時錢糧所難籌畫者在於來春一季但使來春

虛直軒文集

卷之二

六

廣仁堂  
參百玖拾貳

兵餉措處有法則五六月內所徵春季之銀便足以撥夏季之餉此後各季兵餉俱係先徵後撥源源不匱可以行之永久而軍民咸賴矣又內而解京支用款項來春一季約該銀若干外而各省存留支用款項有必不可緩者如驛遞等項錢糧係人計日給食馬計日給料之需來春一季約該銀若干俱須一并通盤打算早爲措處至於協餉一項與本省兵餉不同計五月開徵極速亦需六月起解七月方到彼省則協餉銀兩共計若干更宜合夏季而預籌之者也如臣言不

謬仰祈

睿鑒敕部議覆施行爲此具本謹題請

旨

康熙六年八月二十五日題九月初一日奉

旨該部詳議具奏

戶科給事中臣姚文然謹

題爲各部錢糧事同一體各官開復事同一例請

敕各部照戶部題定奉

旨事理一體遵行以定畫一之規事臣見工部題覆浙江撫

臣蔣國柱題請黃巖縣知縣張中選開復一疏奉

旨據該撫疏稱黃巖縣未完銀兩參後全完爾部奏銷訖今

奉請開復又欲察其支銷款項當時何以奏銷著再明白議

虛直軒文集

卷之二

七

廣仁堂  
參百捌拾捌

奏工部又覆稱臣部查奏銷一案乃係浙江通省錢糧共四

十四萬五百六十五兩五錢零支銷總數冊內竝未有黃巖

縣頂款無憑查核又云通省奏銷之案因各項錢糧舛錯見

在駁查所以黃巖縣知縣張中選不便開復臣深悉部臣慎

重錢糧過於詳慎之意而竊以爲於開復事例各部有未畫

一者也臣曾具有開復之駁查太繁一疏經戶部覆稱開復

一事總以錢糧之完解爲主如續完錢糧與原參數目不符

者應駁年月舛錯未報解司日期未註明領有批收者應駁

至於錢糧完訖解訖該撫題報明白者先請

敕下吏部查銷其支銷奏銷各項專責之藩司督撫與有司

無涉俟

命下之日臣部通行各督撫一體遵行奉

旨依議欽遵在案今臣詳閱浙江撫臣蔣國柱原疏內稱黃

巖縣知縣張中選康熙二年分原未完工部項下銀九百二十七兩九錢四分零康熙二年分工部項下錢糧照款全完訖此正合戶部覆疏中所云續完錢糧與原參數目相符不應駁者也又該撫疏內開載黃巖縣三次共解銀九百二十七兩九錢四分零一批差林文於康熙五年十月十六日解司一批差余盛於康熙五年十二月十五日解司一批差余盛於康熙六年正月二十四日解司內各開解銀細數俱獲布政司批迴俱赴撫院掛銷在案此又合戶部覆疏中所云報有解司日期領有批收不應駁者也黃巖縣續完銀兩既已完訖解訖該撫題報明白矣若照戶部題覆奉

旨事例該縣開復一案應先請

敕下吏部查銷至於支銷奏銷款項不清有應駁查者另駁行該撫轉行藩司令其登答改正是皆浙江巡撫布政之責與完糧之有司無涉也今工部疏稱支銷總數冊內未有黃巖縣款項無憑查核臣查錢糧各冊各有款項如各官開復該撫例有清冊隨疏達部以聽查核名爲續完冊續完冊者

布政司報該縣完銀之冊也支銷冊者布政司報通省用銀之冊也故一縣完銀之款項不符則查核在續完冊責在有司通省用銀之款項不清則查核在支銷冊責在布政司兩冊責有分屬此正合戶部覆疏中所云支銷各項宜專責之藩司與有司無涉者也工部疏又稱通省奏銷之案因各項錢糧舛錯見在駁查所以黃巖縣張中選不便開復臣思續完冊內完銀款項若有舛錯責在有司奏銷冊內用銀款項雖有舛錯責在巡撫兩冊各不相涉今工部所駁查者稱係浙江通省奏銷各項舛錯未必卽係黃巖一縣卽令黃巖縣所完解銀兩該撫奏銷或有舛錯其舛錯責在巡撫其駁查虛直軒文集

卷之二

九

廣仁堂  
肆百肆拾伍

亦問之巡撫萬無令黃巖縣將錢糧完訖解訖布政司發有批收訖巡撫題報全完訖而再責令該縣重賠此九百餘兩之理以此論之該縣無不便開復之處此正合戶部覆疏中所云奏銷各項宜專責之督撫與有司無涉者也止因前戶部題覆奉

旨事例未經通行各部而工部以錢糧爲重不得不仍照舊例駁查以見詳慎之小心耳但此後若不題明更正則各部開復事例與戶部不能畫一在外督撫何以奉行且舊欠之糧續完而不算完原參之案應銷而不准銷灰勞吏催徵之心滋胥吏留難之弊亦屬未便臣乞

勅下各部寺衙門以後各官開復之案俱照戶部題覆奉  
旨事例一體遵行庶足以勸勞吏而速

國課矣事關錢糧字稍逾格統祈

鑒宥施行爲此具本謹題請

旨

康熙六年八月二十五日題九月初一日奉

旨該部確議具奏

戶科給事中 臣姚文然謹

題爲本色備辦甚難官吏私加可慮請

敕部停駁減之例以免由單遲誤之弊杜官吏私派之源事

虛直軒文集

卷之二

十

廣仁堂  
公百叁拾捌

臣伏讀

上諭惓惓於易知由單預造曉示務期早頒由單以杜私派

之源我

皇上誠明見萬里矣 臣思民間錢糧所尤苦累者在於買辦

本色物料一項蓋民間買辦本色銀兩例係兩次徵收有曰

本色原編者此賦役全書內原舊編定買辦銀兩例於地丁

正項內額徵者也有曰司估時價者因今昔物價貴賤懸殊

原編價銀不敷布政司每年照時價估增檄行州縣另行攤

派以備買辦此在地丁正項之外加徵者也在民間額外加

徵已屬苦累而况於由單不早頒往往徵銀在前頒單在後

保無有不肖官吏乘機多派之害乎乃本色由單所以不得早頒者則因部中見行事例凡該撫

題報每年司估時價必候覆允方許刊入由單之故也何也部題定例凡備辦本色各該州縣於三月徵銀解府該府於四月委官採買遲延違限者降職一級法甚嚴也今該撫於二月

題報一候覆允部咨到撫轉行藩司以至州縣已踰三月徵銀解府之限矣况一經駁減又需再題往返之閒已是夏秋有司誰肯甘受違限降級之罪雖欲不開徵在前頒單在後其可得乎故臣愚以謂部中駁減之例有宜停止者四敢備

虛直軒文集

卷之二

十一

廣仁堂  
肆百肆拾肆

陳之駁減在採買之先則由單不得早頒恐有司私行加派一也駁減在採買之後則每年所增估時價原係民間額外加徵在正項錢糧之外與官發正項錢糧採買米豆各項者不同發官帑買官物價有浮多自應駁減還官至民間額外加徵以辦本色者部中不過收其本色物料而止卽價有浮多該駁減者止應退還於民不應復追入官二也且駁減銀兩既追入官則在外藩司以此項銀兩不能追之已得價之商人又不能追之窮苦之委官計無所出或反以部中減價爲名行之州縣重徵之民亦未可定儻若如此則民間一加再加苦累愈甚三也且部中駁減事例不一有估價與上年

相同而允者又有估價與上年相同而駁者有估價浮於原編而允者又有估價浮於原編而駁者有物料未解到而允者又有物料未解到而駁者若云應允則皆可允若云應駁則皆可駁足見駁減皆屬虛文究無確據四也臣查順治九年戶部題定事例布政司照所估時價採買本色該撫咨部備查而已又查順治十二年戶部題定事例採買本色布政司每年酌估時價該撫一面

題報一面檄行各州縣徵銀解府則其不待部覆先頒由單以便開徵明矣今部中見行事例加一番駁減原慮布政司估價太昂恐徵銀浮多亦屬愛民之意但由單不候部覆而虛直專文集 卷之二 十二 廣仁堂 肆百貳拾壹

大臣請

敕部酌議停見行駁減之例仍照順治十二年題定該撫一面

題報一面檄行該州縣徵銀之舊例庶由單頒發不至遲誤而官役私加之弊可杜矣併嚴飭各該撫以後估價題疏必須開明某項本色物料每斤時價若干除價與上年相同各項外其或物料時價不一較上年有增者必須將緣由聲說明白載入疏內不得僅以造冊報部四字簡畧具題至該司估價有比上年過浮者該部察明果有冒開虛報確據將該

司議處如此則藩司估價亦不憂其浮冒矣總之本色與折色不同折色錢糧總歸一項而本色物料款項繁多折色錢糧歷年畫一而本色估價每歲不同小民知曉最難胥吏增派最易故早頒由單以杜私派之源實爲要著緣係條議錢糧事理不敢不詳悉剖陳字多踰格并祈

鑒宥施行爲此具本謹題請

旨

康熙七年八月初五日題初十日奉

旨該部確議具奏

戶科給事中加一級

臣姚文然謹

虛直軒文集

卷之二

十三

廣仁堂  
叁百捌拾貳

題爲駐防兵餉請

敕部酌議該督撫一例奏銷停府州徑行達部報銷之例以

杜延捱侵那之弊事

臣

查駐防兵餉有由該督撫奏銷者如

杭州西安等處是也有部中撥餉貯該府州庫支發該府州

造冊徑行達部報銷者如德州滄州等處是也其由該府州

造冊徑行達部報銷者流弊有二一曰報銷遲延之弊如太

原府駐防兵餉順治十六年存贖七千餘兩至康熙二年方

行撥餉又如滄州駐防兵餉康熙元年存贖二千兩至康熙

七年方行撥餉揆其所由當因此項兵餉徑由該府州達部

報銷任意遲延方今餉缺之地每苦無餉可撥豈應餉贖之

地貯餉不放使駐防兵丁不得早領見在貯庫之餉而必遲待徵比起解之銀此其一也一日積貯年久侵那之弊如德州一處前後州官自康熙元年起至康熙六年止借動駐防兵餉存贖銀至二萬七千餘兩雖積弊見經糾發而存餉已成畫餅揆其所由亦因此項兵餉徑由該州達部報銷在外無稽查之上司以致積貯年久地方有司得以恣意侵那此其一也

臣請

敕部確查德州州官那用順治十八年駐防兵餉存贖銀七千餘兩據該州冊稱報明大部在案未審何年報部作何查結其康熙五年分德州銷算既止放餉銀一萬二千餘兩則虛直軒文集卷之二

廣仁堂  
十四  
肆百叁拾肆

約計彼年尙該存贖餉銀八千六百餘兩果否明晰報部且德州滄州太原既皆有存贖銀兩則各處駐防兵餉由該府州徑行達部報銷者節年有無存贖銀兩似應一并通查仍

請

敕該部將各處存贖兵餉務於報銷冊到之下年卽以本處存贖之銀先儘撥本處之餉使兵早得餉免致存貯積久官吏侵那滋弊凡此後駐防兵餉應俱照杭州西安事例一體令該督撫奏銷其部文徑行該府州支放及該府州徑行達部報銷事例槩行停止則兵餉錢糧內一歸於戶部外一歸於督撫頭緒不致稽查甚便庶存贖之餉銀得清而侵那之

積弊可杜矣臣言果否可採乞

敕部酌議施行爲此具本謹題請

旨

康熙七年八月初五日題初十日奉

旨該部確議具奏

戶科給事中加一級臣姚文然謹

題爲鹽差旣荷更新考成應復舊例事臣見我

皇上留心鹺政選差賢能以爲裕

國恤商計也但鹽政考成之法有未書一者舊例兩淮鹽課

總歸運司考成後因運判分駐淮北遂以運判任淮北考成

虛直軒文集

卷之一

十五

廣仁堂  
參百伍拾壹

而運司專任淮南考成矣此雖見行事例而臣竊謂宜更正

者有三運司官銜兼兩淮

敕書兼兩淮而獨任一淮之考成與

敕書官制不符一也康熙元年部覆長蘆山東兩浙福建等

處鹽課考成之法各分司承催場課仍令運使總覈惟兩淮

與各處考成之例不符一也兩淮運使

題請優敘則帶徵淮北課完俱開列在內淮北課完運司有

功淮北課欠運司無罪事同法異一也况淮北鹽課雖係運

判分徵而交課貯庫解銀起批奏銷造冊俱係運司一人經

營故臣愚以爲宜照舊例運司仍以兩淮考成庶法歸畫一

矣臣言果否可採乞

敕部酌議施行爲此具本謹題請

旨

康熙七年八月初五日題本月初十日奉

旨該部確議具奏

戶科給事中加一級臣姚文然謹

題爲請停無益細冊以廣蠲災實

恩事臣辦事垣中接得大名府送到康熙六年夏災地畝花

名細冊六十三本約一萬六千餘葉駁造至一年之久臣竊

議爲宜停止也蓋造冊有紙劄筆墨雇募書算之費解冊有

虛直軒文集

卷之二

十六

廣仁堂  
叁百陸拾柒

夫挑車載之費舛錯奉駁有重造重解之費此諸費既無正  
項可動總出於被災各花戶耳夫

皇恩將正項錢糧蠲之於上而災民造無益冊籍費之於下

甚可惜也造冊定例部科督撫司府州縣各一本以備磨對

共七本是大名府夏災冊約造四百餘本矣今歲直隸被災

田一千六百八十餘萬畝照例造冊已多數倍况淮揚浙閩

山東等處造冊之繁與費可勝計哉前奉

旨冊籍繁多易於尋隙行駁此類是也臣謂蠲災一事有各

州縣衛簡明總冊并各見年里長甘結報部足矣至地畝花

名細冊不過州縣官吏磨算造送紙上虛文其有無冒免無

可察核之處乞

敕部議停止速行各督撫張示曉諭儻有司以冊費科斂者  
參處則災黎早省繁費實沾

皇恩矣伏祈

睿鑒施行爲此具本謹題請

旨

康熙七年十二月十二日題本月十七日奉

旨該部確議具奏

戶科給事中加一級臣姚文然謹

題爲漕船關係甚重新運遲誤堪憂請

虛直軒文集

卷之二

十七

廣仁堂  
貳百柒拾叁

敕停造船展限之議事臣辦事垣中見戶工二部會議漕船

十年一造事例請

敕總漕會同督撫原限十年之外再展幾年酌議具

題等因誠從爲

國節省錢糧起見也但運務關臣垣職掌既有愚見敢不直

陳臣惟

朝廷大計宜審輕重每歲運漕米三百餘萬石以實

京師按丁給糧沿途設閘修治河道所費甚鉅不止造船一

項但以

京師爲天下根本漕米關軍民性命故不吝重費而行之豈

不欲節省哉運事船爲最重查明初漕規有五年一造者有七年一造者後酌定十年一造已爲節省矣

興胡歷年因之未有更訖以今又議展限不知年限愈遠則見運舊船愈做釘膠易解迴風浪而漂壞必多且額造新船愈少灑帶益重入水深而阻淺愈滯有誤漕糧其未便者一也又部議稱漕船十年有餘豈無可用因請展限所慮誠是也但漕船與江船不同過閘趕幫拽淺守凍回空一遲修船不及又趨新運多有不及十年而損壞者節經

題報可查况既滿十年約往返六七萬里卽有未壞者不過

百之一二豈可因此將通漕船一槩展限耶若不論年限之

虛直軒文集

卷之二

十八

廣仁堂  
肆百肆拾柒

滿與未滿止論船之壞與不壞則未及十年有早壞者將免其按年數追賠之定罰乎竊恐後此造船者不肯選料修船者不肯加工運船者不肯愛惜聽其速壞速造而已初意雖本在節省久之反費錢糧其不便者又一也臣思維再三節省錢糧不必在漕船一項且十年之內節省一次所節幾何今京通倉陳米除放澇糧外積貯無多又時過仲冬回空阻滯節經總漕臣屈盡美江撫臣董衛國浙鹽臣敖哈等

題報此時恤丁催船尙恐有誤新漕豈可復議及造船展限之事哉儻臣言可採仰祈

宸斷將漕船十年一造仍照見行例行儻慮官丁閒有可用

舊船冒領錢糧情弊則康熙四年七月內已經戶工二部會議補船及年應造一疏內云據總漕稱十年改造之船旗丁例應措辦貼備銀兩孰肯將好船折毀改造但該督務須親身嚴查委實不堪者方許改造奉

旨依議在案應再請通行嚴飭可也緣係條陳漕運重計非敢浮泛踰額謹一併

題明爲此具本謹題請

旨

康熙七年十二月十二日題本月十七日奉

旨該部確議具奏

虛直軒文集

卷之二

十九

廣仁堂  
卷百捌拾壹

戶科給事中加一級臣姚文然謹

題爲蘆課不同關稅差官實屬贅員事臣辦事垣中見工部

覆更改關差一疏內將蘆政一差併議差遣臣竊議以爲蘆

課與關稅異關稅者商來自納官可坐收至於蘆課分散在

江南江西湖廣各州縣地方課少者二三兩甚至一兩亦必

專批起解到蘆司衙門路遠者乃至二千里解役跋涉司

蠹需索百姓貼解苦累多端屢經前計臣王永吉撫臣董衛

國按臣秦世貞臺臣祖建明同官臣吳國龍等有蘆政叢奸

亟請歸併藩司等疏在案自康熙四年蘆課歸各省藩司而

江湖南北又各歸左右兩藩就近收課各州縣又將零星課

銀附地丁錢糧彙解民便而又便法善而又善此

皇上見行事例中莫大仁政不應更改者也今九卿科道所會議更改者關差奉

旨查多少者關稅至於蘆課原與關稅無涉卽據戶工二部題差疏內十七差俱開額稅獨此一差開載額課分別顯然蓋稅出於往來之大商恐其倚託上司走關漏稅必需部員彈壓課納於土著之小民自應有司就近徵收况從前差部員時部員亦不能親往三省徵收也仍需有司徵解不過增贅官添蠹役耳以兩者比而論之蘆課遠解別省不若近解本省之便民專解蘆司不若附地丁錢糧彙解藩司之省費

虛直軒文集 卷之一

二十

廣仁堂  
肆百貳拾壹

蘆司在遠督催不若藩司就近督催之嚴切從前諸臣屢奏部議不允皆云恐部差一裁蘆課拖欠今查有部差時反多逋欠逢

赦蠲免自歸併藩司後節經撫臣張朝珍韓世琦董衛國周召南劉兆麒林天肇等題報三省蘆課連年十分全完戶部覆疏可查是見行事例旣已便民又且便

國豈可更改臣又查蘆課於康熙三年奉

特旨交與戶部矣康熙四年戶工二部會議疏內分晰兩部

各差又題明蘆課爲戶部所屬矣是課與差俱屬戶部使此差應復豈有蘆課十三萬之多戶部題差疏內反行遺漏耶

總之蘆課非關非稅歷來有司徵收改差實屬贅員仰請  
乾斷停此一差仍照見行事例行便

國便民萬世永利矣緣係備查蘆課歷年事例非敢浮泛踰  
格統乞

睿鑒爲此具本謹題請

旨

康熙八年三月初一日題本月初三日奉

旨據奏蘆課差部員時反多通欠逢赦蠲免歸併藩司後蘆  
課連年十分全完事例便民便國又稱康熙三年奉特旨將  
蘆課交與戶部等語工部何以奏請差遣該部一併察議具

虛直軒文集

卷之二

二十一

廣仁堂  
壹百捌拾貳

奏

